

34
GEORGII ERNESTI STAHL D.

Prof. Publ. Ordinarii

POSITIONES,

De

MECHANISMO MOTUS
PROGRESSIVI
SANGVINIS.

Quibus

MOTUS TONICI PARTIUM
POROSARUM

Necessitas, Utilitas, & Habilitas,

ad

MOTUM SANGVINIS, LYMPHÆ,
SERI,

PARTICULARITER


*Dirigendum, admittendum, vel excludendum,
demonstratur,*

Pro futuris usibus PATHOLOGIÆ variorum affectuum,
maximè verò

FEBRIUM,

apodicticè evolvendæ.

HALÆ, Typis CHRISTOPHORI SALFELDII, REGIMINIS
BRANDENB. Typogr. 1695.



PRÆLOQVIUM.

Nter alia utilia seculi nostri inventa, non potestremum sanè est illud, quod de *Motu progressivo*, seu *Circulatione Sangvinis*, Anatomico-Medico studio innotuit. Miranda prorsus esset Veterum tam longa & diuturna ignorantia, in detegendâ hâc Physicâ Veritate, si nostrâ quoque ætate, prudentiâ aut industriâ humana repertum fuisset hoc negotium, sed cum jam quoque, non nisi casu quodam, in notitiam hujus rei perventum sit, non est, quod magnoperè iis quicquâ indignemur. Tantò magis sanè, cum in inventione ipsâ, simpliciter ferè substituerit seculi, etiam ad nauseam usqve curiosi, habilitas, & accuratius ejus examen, ad utilitatem & efficaciam ejus Physico-mechanicam eruendam, non æquè curiosè continuaverit. Profuisset sanè eximiè, si *mechanica* aptitudo hujus *Motus*, evidentius perquisita fuisset, ad exterminandos difficillimos illos, & intellectui planè steriles, conceptus, de *Spiritibus Vitalibus*, de *Vitâ* in abstracto considerata, & ἐντελεχεία, (cujus explicatiorem sensum, *Hermolaum Barbarum* etiam ab ipso Dæmone frustrâ requisivisse memorant,) de *Fermentatione*, (proprie dictâ) *Sanguini* familiari, & *Sexcentis* illis *saporibus* Hippocratis, &c. Quid enim, quæso, volunt *Spiritus* illi *Vitales*, *Balsama Vitalia*, & similia commenta, nisi hoc unum, quod *Modus fiendi*, (non modò *instrumentalis*, sed ipse *modus essendi*, seu *formalis*) ineffabilis & imperceptibilis sit. Quotusquisque verò attendit hætenùs, quod sub *motu Sanguinis Circulatorio*, *mechanica* penitùs habitudo & procli-

vitas ad *conservandum & depurandum* Sangvinem suppetat, quâ præsente ad Chimæras illas confugere penitus intempestivum fuerit. Quotuscunque, inquam, perspexit non tantum, quod sub *Motu* Sangvinis *attenuatorio*, & *distributorio*, *Secretoria percolationes* ita aptè subordinatæ sint, ut unum sine altero, *circuitus* sine *depuratione* nequaquam fiat: Sed quotusquisque pensitavit etiam, quod hæc ipsa subordinatio, sit ingens illud (licet labore *simplex*) *artificium*, quo omnis causa & effectus *corruptionis*, opportunissimè præoccupari, & nihil nisi *justum & utile*, retineri & asservari, possit, & soleat. Reverà autem non potuit magnoperè utilis esse detectio *Motus Circularis*, quam diu nemo vel excogitare potuit, vel observare voluit, quomodo Sanguis, *particulariter*, in hoc suo *Motu progressivo* gubernetur, ut huc illuc, vel copiosius, vel parcius, in partes, *sigillatim*, præcipuè *Colatorias & Excretorias*, penetrare valeat. Cum enim, inde, ex hac, inquam, notitiâ deficiente, tot *congestionés*, *translationes*, *stases* humorum, non nisi solis vitiis *Cra-seos*, & *fortuitis obstructionibus*, attribuere possent, mansit sanè incognita *Pathologia* tot fonticorum affectuum, qui à MOTIBUS Sangvinis *destinatis*, ad certas partes, & ad certos fines, pendent, in specie *Criticarum* evacuationum, *consuetudinalium* Congestionum & Evacuationum, *Patheticarum* Commotionum Humorum, omnium generum *Artbritidis*, vera occasionalis & formalis ratio, *Nephriticorum*, *Hæmorrhoidalium*, *Loebialium*, *menstrualium*, (non *materiarum*, sed) MOTUUM Tragædiæ, imò Colicorum, *Hypochondriacorum*, & *Hystericorum*, quin *Asthmatico-Phthysicorum* quoque affectuum, frequentissimæ causæ. Inde profectum est, quod veteribus quidem, frivole satis, indignemur, quod *bilem*, *melancholicam*, *pituitam*, *atram* *bilem*,

bilem, finxerint : Interim ne nos quidem aliquid concinnius, nisi *nominis mutationem*, substituimus, cum nostro *acri, acido, austero, pontico, salso, & acidis specificis*, jam *Pleuritico*, jam *ophtalmico*, jam *anginode*, jam *Hemicranico*, &c. &c. Et omnia in solâ *intemperie* Humorum quærimus, ad quam salvandam, & stuporem incutiendum mortalibus credulis, ad ludibrium usque frequens, & mox in proverbium abiturum, illud: SEXCENTA alia: prætendimus. Non rejicio sanè, aut damno, efficaciam *salsedinum*, præcipuè acrium *fermentescentium*; Sed adeò *frequentem* eandem, & latè patentem esse *causam*, ad tot *diversissima* effecta producenda ipsam sufficere, tam fonticas turbas ipsam concitare posse, imò toties *causam*, & non potius *effectum*, esse illam *salsedinem*, hoc sanè est, quod summâ ratione dubito, vel simplicissimâ illâ *Experientiâ* inductus, quod *vera, drastica, & copiosa, acida, acria, Corrosiva, austera, amara, dulcia, salsa, caustica, alcalica, urinosa, spirituosa, oleosa*, quædam nullas, pauca exiguas sanè, alterationes *Humoribus* inferant, si *intus* in Corpus assumantur, & quidem non tantum in *Corpus sanum*, sed omninò *egrum*: Quascunque verò alterationes inferunt, illæ non modo *leviores*, sed planè *diversæ speciei*, observentur, quàm illæ, quæ à suppositâ *Cacochymia* tali, deducuntur. Profectò, si duo illa *Maria Mortua*, Antiquorum *Cacochymiam*, & Modernorum *Scorbutum*, inspicimus, non aliter quàm in *Asphaltite*, omnia circum arida & sterilia observamus. Cum contrà, si *Motûs* Sangvinis & *Lymphæ* atque *Seri* attendamus, molimina *Tonica*, quæ pro ipsorum majore *Excretionem*, adeoque *depurationem* residui, necessariò & concinnè instituuntur, attentè dignoscamus, *Circumstantias* horum *Moliminum Tonicorum* exquisitè perspiciamus, (quæ

partim *necessario* conjunguntur, partim consequuntur) deprehendemus subinde longè aliam faciem rerum, quàm vulgò æstimatur. Sed cum ad hujusmodi examina indispensabilis sit notitia *Physico-Mechanica*, *hydraulica*, & *Experientia* simul *Clinica* (ut, quid fieri soleat, quid actu, & ordinario, fiat, non quid fortè fieri possit, certifimus,) mirum non est, si sub horum requisitorum defectu, passim communissimo, nihil accurati eruatur.

Unicum exemplum adduco, quotidianum, *Inflammationis*, à *contusione* v. g. ortæ. Sunt ibi, ab *Experientia*, circumstantiæ affectus ipsius, (1) *collectio* & *subsistentia* Sangvinis in illa particulâ. (2) Inde *tumor*, (3) mox *dolor*, (4) *rubor* (5) *æstus* (6) sub his omnibus, *tumoris durities* (7) *sensim mollescens*, (8) inde magis *exturgescens*, (9) *dolorem lancinatorium augens*, (10) tandem *perrumpens*, (11) & *materiam spissiusculam*, *salsam*, *fundens*. Porro ab *Experientia*. Si à *contusione* simili colligatur *stasis* Sangvinis, ibi omnes hætenus dicta confectaria, non sequuntur *inevitabili* necessitate: Sed fit & alius affectus planè *disparium* Circumstantiarum, sequentium: (1) *tumet* pars, (2) *dolet leviter*, (3) cum *lancinationibus* tamen raris, sed penetrantibus, *sub initium*: (4) *livet*, & *pallet circum*, (5) *frigescit*, (6) *mollescit* mirificè, (7) *putrescit*, (8) *excidit* tota portio solida, &c. Datur & *tertius*, iterum *diversus*, *status*, sed sufficiant tantisper, hi duo. Si jam *vulgarem Pathologiam* hujus *primi* statûs, *Inflammationis suppurantis*, inspiciamus, est sequens. Sanguis *collectus* (a) *crassescit*: (b) *fermentescit*, seu movetur *intestine* (c) ab hoc motu intestino *incallescit*: (d) *acrescit*, (e) inde *rodit* & *vellicat*, *dolet*, (f) *corrumpitur*, (g) *erodit* denique partem, & *profluit*. Sed obstant sanè non levia dubia, (a) *crassescit*, rectè, (b) *fermentescit*, qualis fermentatione? cui fermentationis generi aptus est Sanguis? Sanguis, inquam, *sibi relictus*? nulli profectò nisi *putredinosa*. Quod satis dilucescit in altero illo contrario eventu, *Sphacelo*, (c) quod sanè insigne illud augmentum caloris inflammatorii, à fermentatione non fit, monstrat (1) *Experientia*, dum nullum fermentans *liquidum*, ita ad sensum *incalescit*, sed tantum *putrescentia*, eaq;

non

non liquida, sed *solidescentia*: (2) jam verò in illo contrario eventu, *Sphacelo* ubi manifesta & indubia est *putredinosa fermentatio*, *friget pars*, quæ ex hac *hypothesi*, tantò intensius *calere* deberet, (ubi nemo mihi obijciat *gangranam*, quæ *inflammationis* ultimus gradus est, ad *Sphacelum* verò tantum abest, ut *necessario* pertineat, ut millies oriatur *Sphacelus*, sine ullò *gangrænæ* præludio) (d) *acrimonia* sub puris ortu, non quidem in totum dubia est, sed *rodens* illa, & *dolorem* directè inferens, propterea esse dubitatur, quia *dolor*, qui ingravescit cum *maturatione* puris, eo momento evanescit, quo aperitur abscessus, quod fieri non posset, si ab *acrimonia* inferretur, dum utiq; pure nondum evacuato, adhuc durare deberet: Ubi *Experientia Clinica*, iterum monstrat, quod in capacioribus abscessibus, quorum pus simul evacuare inconsultum est, licet adhuc multum pus in abscessu relinquatur, simulatq; saltem aliquid emissum est, *dolor* ultra omnem proportionem *rationis*, evanescat, qui nempe tantus adhuc manere deberet, quantum acris puris adhuc restaret, quod *Experientia* contrariatur. (e) *corrumpitur*: Unde verò hoc *genus* corruptionis? audio sanè dicentes, *naturam esse artificiosam*, habere in suâ potestate, longè alias *Fermentationes* producere, quàm artificialis imitatio: sed quid opus est *Rhetoricâ*, dic disertè & Laconicè, quod sub his verbis pallias: NESCIO. Artificium *Natura* non negamus, sed tale sanè negamus, quâ illa ex aliquo Mixto facere possit, illud, ad quod Mixtum illud ineptum est.

Contra, si secundum *Mechanismum Motûs Sangvinis Localis*, negotium *Inflammationis* consideremus, & *stasim* Sangvinis, ut *causam*, ab *Inflammatione*, ut *effectu*, secernamus, conficimus sequentia: 1) *Stasis* illa Sangvinis, non est necessaria & inevitabilis *causa* tanti *tumoris*, si enim ad *Sphacelum* terminetur, longè minor est *tumor*, imò in reliquâ vicinâ potius *marcor*, teste *Experientia* (*œdematodes* inflatio, ut non perpetuò *Sphacelum* sequitur, ita quando cunq; sit, non conjungitur *fienti Sphacelo*, sed sequitur *factum*.) 2) Non necessario, vel *stasim* simpliciter, vel simul *tumorem*, sequitur tantus *calor*, ut in *Sphacelo* nimis quàm manifestum est, qui *friget*. 3) Neq; vel *stasim*, vel *tumorem*, necessario sequitur tantus *dolor*, ut non modò in *Sphacelo*, sed in *Scirrhusâ* quoq; exsiccatione *stasim* similium, innotescit. (4) Nec *corruptionem* sequitur hic *dolor*, necessitate ullâ, ut non modò in *Sphacelo* clarum est, sed in ipsâ quoq; *inflammatione*, quæ æqvè in *principio*, in nondum factâ, imò vix *fiente*, *corruptione*, ac postea, valdè dolet.) quo *major* verò, & *durior*, & *rubicundior* est *inflammatio*, eò *major* est *dolor*.

Uterius, quoad *comparationem* cum *Sphacelo*, respectu *gradus declinationis à statu Naturali*: 1) In *Inflammatione* manet pars Sangvini *fluida*, pervia & accessa, In *Sphacelo* perit *commeatus*: 2) ipse *Sanguis*, in *Inflammatione*, circum circa est *floridus*, *mobilis* & *in motu*: In *Sphacelo* subsistit, coagulatur. 3) ab illo motu Sangvinis intenso circa partem *stagnantem*, augetur præcipuè *calor*, unde in *circumferentia* maximè, seu *circulo* illo *rubeo*, est maximus *calor*, & quo magis *rubet* *inflammatio*, eò magis *calet*: In *Sphacelo* contra ob *Sanguinem* subsistentem, fit *refrigescentia*. 4) *Inflammatio* quamdiu & quâ talis, semper est optimæ *spei*, *Sphacelus* absolutè est *Mors* illius partis, quam occupat, eamq; totam aufert.

In fine conficio in genere, Sangvinis ita subsistentis, eventum *minus p. n.*, esse *Inflammationem suppuratoriam*: absolutè *p. n.*, esse *Sphacelum*: Ex optabiliora itaq; & ab

& ab eventu *utiliora* esse accidentia *Inflammationū*, quàm *Sphaceli*: Non adeò directè proinde oppugnanda, aut expugnanda, (persistente adhuc causâ, nempe *stasi*) cum aliàs immineat *Sphacelus*, imò introducatur (docente utiq; tristi *Experientiâ*) Adeoq; factâ alicubi *congestionē* *Sanguinis* otiosâ, & *stasi* coagulatoriâ, comparativè loquendo, *Inflammationem* suppuratoriam, *utilem* & *salutarem* esse, cum deficiente ipsâ, immediatè *Sphacelus* sequatur.

In specie verò, video sequentes circumstantias *Mechanicas*. 1) *Movetur* Sanguis *intensius* circa portionem illam immediatè subsistentem; Et quidem localiter *movetur*, *transprimitur*: 2) *attollitur* inde, seu *distenditur* pars, 3) *rubet*, 4) *calet*: 5) ab eadem *distensione* fiunt longè sensibiliores fibræ partis, ut tanquàm ardorem sentiant, quæ vix eximia *incalescentia* est, & singulorum *pulsus* impulsuum ulteriorem *tensionem*, pro puncturâ seu *lancinatione*, aut ad minimum *sensibili pulsatione*, repræsentent: 6) Interim continuo hoc calore, invertitur & turbatur libera *putrescentia*, 7) præcipuè verò, *exoritur*, tenuis acris *corruptela*, mediante ipsa Sanguine ita transpulso, *abstergitur* perpetuò & avehitur, ut non nisi *crassiores* portiones remaneant, terreæ, pulposæ, minùs agiles aut ulteriùs corruptibiles. Contrà in *Sphacelo*, perit ille *commeatus* Sanguinis, unde abest omnis *rubor*, omnis *Calor*, omnis (præter ab ipsâ portione stagnante) *tumor*, & sublato omni *commeatu* & *transitu*, qui auferat *eliquescentes*, *tenuēs*, *activas*, *fermentescētes* seu *putrescentes*, portiones, *invalet* citò libera illa & uniformis *corruptio*, & fit absoluta *putredo*.

Undè præcipuè *Mechanismus*, qui *Inflammationem* quidem efficit, sed loco *emortualis putredinis*, *tolerabilem* corruptionem, *Pus*, perficit, non consistit in speciali aliquâ, *incomprehensibili fermentationis* specie, sed maximè in perpetuâ *abstersione* portionum *eliquiscentium*, & in primâ *potentiâ putredinis* constitutarum, ne plures congeneres unâ commovere, & ita *fermentali* progressu *invalescere*, possint.

Hoc tanè est illud *simplicissimum* artificium, *mechanicum*, quo impeditur, ne *stasis* talis in *Sphacelum* abeat, i.e. *absolutè putrescat*: Interim *tumor*, & inde major *sensus*, & quidem majoris *caloris*, ut & *pulsus*, & major *rubor*, sunt quasi *necessaria* consequentia, adeò ut illis incongruè impeditis, turbetur, imò tollatur, necessarius ille intensior & copiosior *transitus*, qui partim *caloris* utile augmentum, partim *ablationis* perpetuæ seu *abstersionis* effectum, præstare debebat. (De *serosa salsa* materiæ *utili* affusione, hîc nihil dicemus, cum præcipuè non tam manifestò demonstrabilis, quàm tantum *probabilis*, illa existat.)

Ad hujus ipsius affectûs normam, si reliqua quoq; *Symptomata* expendamus, quæ *congestionēs* *Humorum* ad certa *Emunctoria* (vel *naturalia*, vel *consuetudinaria*) necessitate *consequentia* comitantur, longè alia profectò facies inde conspicietur affectuum plurimorum, quàm vulgò solet. Quod ipsum quidem, ut impofterum exactiùs & ex institutò peragere, cum Deo, speramus, ita hîc loci tantum primum, & veluti fundamentalem *Mechanismum* MOTUS SANGVINIS PROGRESSIVI proponere suscepimus, à quo deinde variæ ejusdem *intensiones*, contra res p.n. *utiliter* directæ, in variis affectibus, præcipuè verò FEBRIBUS, luculentiùs deduci,

& non magis ad *PATHOLOGIAM*, quàm ipsam solidam *THERAPIAM*, applicari possint,



I. N. J.
THES. I.

Motus Sanguinis progressivus, verè, ordinariè, fit S. N.

IN voce *Motus progressivi* non est ambiguitas, denotat nempe talem progressum, quo Sanguis perpetuò profluit, ut illa portio, quæ modò extremum locum in arteriarum capillaribus ramulis obtinuerat, jam extrà arterias protrudatur, & ea quæ in ipsius locum jam successit, sequente pulsu pariter extrudatur, & ita, quolibet pulsu, portio Sanguinis extrà arterias expellatur; Fit verò hæc expulsoria promotio Sanguinis, non solâ constrictione Cordis, aut arteriarum, ita enim successivè omnis Sanguis ex arteriis exprimeretur, ut ipsæ vacuæ remanerent: Sed fit novæ portionis assumptione, ut quantum in cordis ventriculum, sub *Diastole* cordis, per *auriculæ motum*, impressum est, & *Systole* cordis in arteriam impellitur, tantundem per arterias extremas excedere cogatur, non aliter quam in quolibet *Siphone*, qui *haustro* (seu *ventili*, ut vocant,) instructus est.

Sanguis, qui ita movetur, est ille, cui *lymphæ* portio perpetuò admiscetur, ex ipso *ductu thoracico*; prætereà *serosô* quoque, *aqueo-Salino-oleosô*, tenui liquamine (quod ex ipsâ resolutione Sanguinis fit) perpetuò dilutus existit: Adeoque non *strictè*, sed à *potiore* quantitate, Sanguis dicitur.

Verè fieri, ne ipsi contradicentes negant; Ordinariè saltem fieri

fieri, & *secundum naturam*, negant, quomodo verò p. n. *extraordinariè* fieri soleat, ita explicant. Si pars aliqua solida labore, aut ipsa *arteria* Sangvini continendo destinata, *vulneretur*, aut *obligetur*, tunc demum *mitti* & propelli copiosiores *Spiritus Vitales* ad partem, vel portionem arteriæ læsam, & ita simul secum rapere *fluctus* Sangvinis, idque tamdiu continuari, quoad læsio illa vel restituta, vel ad minimum sublevata sit. Extrà talem p. n. provocationem, *subsistere* tantum sanguinem, & *stagnare*, *Spiritus* verò in hoc stagno sursum deorsum vagari, & *fluidum*, *floridum*, *vividum*, *calidum*, Sanguinem conservare, & dum *Spiritus* non nisi moderatâ quantitate ad partes solidas s. n. commeare necesse habeant, proinde tunc temporis, *ordinariè*, s. n., non ita in *fluctus* attolli & propulsari Sanguinem, i. e. *non progressivè moveri*.

Confirmant autem veritatem *progressivi* motus, 1) *Structura vasorum Cordis*, ubi oculo patet, singulâ quaque *Diastole* cordis, necessariò Sangvinis portionem in ventriculos irrumperere (seu in *auriculas*, & ab his in ventriculum proximum impelli) subsequente verò *Systole*, non iterum in eadem vasa retrogredi posse, propter *valvulas tricuspidales & mitrales* dictas, unde necessestariò in *arterias*, ex constricto ventriculo, impellitur: Hoc verò dum *singulis pulsibus* ita contingit, in arteriis tantum Sangvinis retineri posse, *sine exitu*, absurdum statim est. Quemadmodum in *dextro* ventriculo, *structura valvularum semilunarium*, arteriæ pulmonalis, & in *sinistro*, valvularum *Sigmoidearum*, arteriæ magnæ, statim demonstrant, quod è *dextro* ventriculo, *Systole* Cordis, Sanguis impellatur in *arteriam pulmonalem*, è quâ ne relabatur, *valvule* istæ opponuntur, & similiter in arteria magnâ.

Deinde & 2) monstrant hoc idem, etiam *ulteriores valvule*, in *minoribus* arteriarum, præcipuè verò *venarum*, ramificationibus, in quarum videlicet *cavitatibus*, hinc inde, tales *sacculi valvulares* pendent, qui retrò cessionem sanguinis, ad illam partem unde venit, remorentur & inhibeant: Ut ex Anatomicis notum est.

THEs. II.

Absolvitur hic motus Sanguinis progressivus, duplici impulsu, altero interiore, Systole cordis, altero exteriori, Tono partium porosarum.

DE *interiore, Pulsu*, notum hodie est negotium. Nempè Cor, ut musculosum, carneo-fibrosum, Corpus, cavitatibus prætereà duabus instructum, dum movetur, & quidem *contractivè*, ibi exprimitur fluidum in hisce cavitatibus contentum, & quidem in *canales arteriosos, pulmonalem & aortam*, ad venosorum verò ostia resistunt *valvule* notæ; *Arteriosi* hi canales, sunt valdè *densi, tenaces, renitentes*, ut non magnoperè distendi possint: Itaque Sanguis in illos impulsus, *subsistentiam* in ipsis non invenit, sed saltem *per ipsos*, ut ductus, *transpellitur* ad alia loca. Dum verò Contractio Cordis remittitur, *Diastrale*, ibi ab auriculis imprimitur in ipsius utrasque cavitates novus Sanguis è venosis vasis, qui subsequente *Systole* denuò promovendus est.

De *altero* vero propulsionis genere, *exteriore*, in partibus *solidis mollibus*, fibrosis, minùs adhuc perspecta vulgo est, cum certitudo, tum necessitas, quam utramque non nihil evolvere cœpi *Dissert. Epistol. de Motu Tonico Vitali*, & hinc dependente *Motu Sanguinis particuli*, cum verò partim *Methodus* tractandi, (ab *exemplis* enim *Practicis* veritatem rei deducere susceperam) partim *stylus* (in hodierno lingvæ contemptu) maximè verò, qualiscunque, etiam, notitiæ *hydraulicæ*, defectus, ut alia taceam, plerosque impediverit, quò minùs, vel me, vel rem, intelligerent, propterea paucis repetam, hoc ipso loco, summos illius rei apices.

THEs. III.

Sanguis ille, qui pulsu per arterias pellitur ad partes, non transit immediate ab arteriis capillaribus, ad & in venas capillares, sed ex arteriis exilissimis, in porosam substantiam partium

*exprimitur, per hos poros demum transprimi-
tur, & reprimitur in venas.*

Sunt, qui putant, venas & arterias *anastomosi* jungi, id est, *arterias* magis magisque extenuari, donec in *exilissimos tubulos*, vix telæ araneorum comparandos, extenuentur; in hac subtilitate variis flexibus & gyris aliquandiu continuari, deinde sensim iterum augescere, & magis magisque *ampliari*, donec in capaces illos canales quos *venas* vocamus, degenerent; Sufficeret ad *negationem*, (1) quod hanc hypothesin verificare, *probationibus* nemo possit, (2) quod causa nulla appareat, quamobrem tale quiddam fingere debeamus: Sed supersunt etiam *positivæ* difficultates, quæ conceptum talem tantò magis dubium reddunt. I. Primò enim, si talis *immediata* *continuitas* inter arterias & venas subesset, quomodo fierent *secretiones* variæ, de *Lymphatica* & *serosâ* substantiâ, quales contingunt, tam in *sudoribus*, quàm *exsudationibus*, quæ in *excoriatione* partium levissimâ occurrunt: II. Deinde conceptum planè frustratur, quomodo fieri possit, si *vulnere*, aut *suppuratione*, tales canaliculi utique discindantur, aut planè magna pars ipsorum absumatur, quomodo, inquam, ita minutæ extremitates se invicem rursus invenire, & denuò coalescere possint, cum contrà, in substantiâ *generaliter* porosâ, ubi tam exquisitus & infallibilis coalitus, corpusculorum *numero* eorundem, non requiritur, longè commodius restauratio perficiatur. Tandem III. nititur maximè in hoc negotio, diversitas illa, quæ in diversis subjectis, ratione *Spongiosæ* *porositatis* & mollitiei partium, observatur; Dum ita dicti *Sanguinei* & *Plegmatici* habitûs, homines, habent *carnes* valdè *turgidas*, *laxas*, *porosas*, ut intrâ hosce poros multum *Sanguinis* contineri possit, unde etiam ordinariè habent *vasa venosa* admodum exilia: Interim ipsi tales (*laborioso* vitæ genere, aut *febrilibus* passionibus, quibus *Sanguis* copiosè è partibus in *vasa* reprimitur, & *vasa* ipsa distendit atquè ampliat) quotidie observantur transire in *Cholericum*, & *Melancholicum*, habitum, id est, subsident & contrahuntur sive densantur partes, minuuntur eo ipso pori, ut non amplius tantum *Sanguinis*, quantum antea, in ipsos impelli

pelli possit, unde evadunt venæ tantò magis turgidæ, quales ta-
 libus personis ordinariæ sunt. Si jam vera esset illa *continuitas*
 arteriarum cum venis, è duobus unum necessario contingeret,
 vel enim (1) in laxo illo habitu, ubi sanguine omnia turgent,
 summè conspicuæ esse deberent continuïtates tales, cum tan-
 tum sanguinis, tam longè & liberè transparentis, hîc occurrat :
 vel (2) in succedente eximio illo decremento & arctatione,
 musculorum talium partium, perirent, ad minimum quoad
 maximam partem, *continuitates* illæ expeditæ, & nascerentur,
 mille incommoda, obstructions, stases, corruptiones in tali-
 bus locis : Sed quicquam horum undiquè contingere, ne con-
 jicere saltem licet, nedum observare.

THES. IV.

*Dum verò Sanguis ita ex arteriis in poros
 partium exprimitur, ut per poros partium trans-
 igatur, & in venas valdè exiles denuò impri-
 matur, opus utiquè est aliquo concursu motorio,
 aut motum reliquum juvante.*

Firmitas certè in parte tali requiritur, ut fibræ illius in perpe-
 tuâ justâ *tensione* teneantur, ne ab irrumpente Sanguine in-
 terstitia sive pori illarum *distendi*, & ita *stasis* sanguinis extrâ
 vasa sua, fieri possit ; Videmus utiquè, facillè tale quid contin-
 gere, uti in *refrigeratione* partium *humidâ*, aut in *dolorificâ* par-
 tium irritatione, maximè verò in *paralyticâ* partium *atoniâ*, ubi
 enervato aut neglecto tono, aut provocatâ majore affusione,
 humorum, facillè & citò fit *inflatio* & *infarctus* partis.

Quin imò, si ipsa illa *continuitas* arteriarum, cum venis,
 quam maximè vera esset, necessaria sanè foret talis *stata firmitas*
 partium mollium, per quas excurrerent hæc vasa ; nam aliàs
 hæc *exigua vasa*, facillè à subsequente impulsu potius *distenderen-*
tur, & sanguine illo, qui per pulsum intruditur, *ampliarentur*,
 quàm ut continuarent hunc ipsum impulsum, ad majores ve-

nas usque, & totam majorem molem sanguinis in his stabulantis.

Et sanè repugnat omnibus *legibus hydraulicis*, quod liquor aliquis è canalibus majoribus, per minores & valde teneros, transpelli possit, & impetum hunc transpulsionis ita conservare, ut in perpetuo progressu perennet, nisi minores illi & teneri canaliculi, firmo aliquo fulcimento circummuniantur, ne impressione illâ distendi, aut omninò rumpi possint, sed proportionem impulsus, proportionato *nisu & continentia* suscipiant.

THES. V.

Concursus hic, est stata partium solidarum molliorum tensio, mediante quâ sanguis, pulsu impulsus, ita cogitur, ut in directo progressu perseverare, adeoque per poros saltem transire, necesse habeat, nequaquam verò ipsos distendere & ampliare possit, & subsistentiam in ipsis subire.

T*ensio hæc seu τὸν, cum fiat in partibus mollibus, mobilibus, flexilibus, Motus sanè species est, quemadmodum omnis tensio, stricto sensu, rei Mobili tantum competit, & actuali motu induci debet, adeoque, exquisitè loquendo, non est, nisi certus gradus Motus, qui non modò remitti, sed & intendi subinde, potest. Tantò magis verò hæc tensio, partibus solidis, in ordine ad motum Sanguinis promovendum, solennis, nomine actualis Motus insigniri potest, imò debet, quia non modò potest intendi aut, remitti, sed actu intenditur & remittitur, in statu planè naturali, de quo itaque negotio ulterius dicemus.*

THES. VI.

Tensio hæc non ita comparata est, ut quasi densitas aliqua in solidum, seu durities partis, immutabilis persistat, ut in ossibus; Sed habet per-

perpetuas leves vicissitudines, ut modò intendatur, adeoque pars magis arctetur, atque primum nuantur, modò remittatur, & inde pori relaxentur, & ampliatiōi distensoria obnoxii fiant; Et quidem prorsus in Statu S.n.

Specimina hujus rei vulgatissima sunt, in repentinâ, etiam levi, refrigeratione, unde horripilatio (*Gänsehaut überlaufen*) in algore intensiore, aspectus quasi macilentus, das frosterig oder verfrohren aussehen/ in terrore repentino similis contractiō partium corporis solidarum, tam cutis, unde pallor, quam musculorum, unde parilis quasi-*emaciatio*, erschrocken aussehen/ von Schrecken aussehen wie eine Leiche: Et contra, inflatio partium ab externâ blandâ incalescentiâ, præcipuè humida, unde manus vel pedes à fotu aquæ calidæ turgescunt, rubescunt, vasa ipsa quæ partes has percurfant, tumescunt, relaxatis partibus solidis quæ ipsis insternuntur: Præterea in somnò, manifestò turgescit corpus, & circa ligaturas paulò adstrictiores, notabiliter protuberat, rubent simul partes intensius solito, genæ, labia, imò profluit penitus tenuior Lymphæ & seri portio, ut mador & sudor emanet, ut de gaudio, pudore, ruborem suffundentibus, non plura addamus.

THES. VII.

Quantum verò hac variatio Toni partium, seu Motus hic Tonicus, faciat ad Sanguinis progressum in poros, & transgressum per ipsos in venas, variandum, non modò à priori facile concipere licet, sed demonstrant id ipsum quoque, indivisa consecutaria mutationum, caloris, coloris, præcipuè verò valorum intercurrentium, manifestæ inanitiones, aut intumescentiæ,

Manifestum videlicet est, quod pars aliqua *spongiosa*, cujus pori liqore aliquo expleti sunt, si *contrahatur*, liqvor ille ex poris necessario eliminetur; Et quamdiu pori in hac compressione detinentur, pro hujus gradu, parum aut nihil in ipsos denuò injici queat: Quod promptè fit, si compressio illa remittatur. Deinde in omnibus supradictis *Motus Tonici* variationibus, concurrit tum *coloris* mutatio in pallidum, aut contrà, tum *caloris* in *frigidum*, aut contrà: Præcipuè verò *vasorum venosorum* repentina *exinanitio* sub *contractione*, & *repletio* atque *turgescencia*, sub *remissione Tonici* partium porosarum, cuilibet attendenti, præcipuè *amplioribus* vasis prædito, manifestò occurrit, quæ etiam in suprà dictâ *Dissert. Epist. de Motu Tonico*, & proximè, cum Deo, edendâ alterâ *Dissert. de Fluxu & Refluxu seu Æstu Maris Microcosmici*, latius deducta habentur.

THES. VIII.

Hic Motus Tonicus, modificat præcipuè progressum Sanguinis per partes porosas, vel admit- tendo copiosius, vel intercludendo; Ut adeò sola quantitas pulsus minimè sufficiat, ad proportionatam copiam Sanguinis per partes trans- pellendam, sed necessario requiratur congrua proportio Toni, quo recipiatur, seu admittatur, illud quod pulsu appellit.

THES. IX.

Ipsæ hic Motus Tonicus, moderatur etiam particulariter, ingressum Sanguinis, in unam partem, imò particulam, præ reliquis, ita, ut si illa pars vel contrahatur Tonicè, vel relaxetur, ad illam præcipuè, præ reliquis, plus Sanguinis vel intromittatur, vel inde expellatur.

Res valdè manifesta est, etiam in Statu magis *naturali*, maximè verò familiaris in Statu p. n. varii generis. Ita v. g. si quis *alterum pedem*, aut alteram manum, aquæ tolerabiliter *calida* aliquvandiū imponat, mox *turgescent* vasa hujus, & musculi ipsi, cum *rubore* totius partis, longè magis, quam alterius, præsertim si *altera illa actu refrigerata* sit: & ita etiam contrà, si *pars una præ alterâ refrigeretur*, *constricta illa*, *pallida*, *exsucca*, apparebit, *vasa in eâdem repente inanita* apparebunt, præ reliquis: Quamvis ferè contingat, præsertim si *insignior* provocetur talis alteratio in una aliquâ parte, ut inde similis vel *contractorius*, vel *remissorius*, actus (*præcipuè tamen constrictorius*) etiam ad reliquas, minimè eodem modò tactas, diffundatur. Exemplaria varia, allegavimus, præcipuè verò ita dicti *Raptus ad caput*, in citat. Dissert.

Σκέψις ἢ Σκῆψις.

An hic Motus Tonicus ordinariè, magnâ veluti Diaστοle & Systole, pulsui contra respondeat, nec ne, determinare nondum ausim; illud pro certo dicere possum, quod non rarò, quietè cubans, in externo corpore manifestam lentam speciem Motus percipere mihi visus sim, apertè Systaltici & Diaštaltici, à pulsus rythmo, & respiratione, planè diversi, idquè aliquando in toto illo latere, quod decubitu pressum, quasi sensibilibus erat, aliquando etiam in Capite quasi seorsim, aut eminentiùs sanè. Unde, an, & quomodo, tale quid certò deprehendi valeat, cujuslibet pensitationi & curiositati commendo.

THES. X.

Huic maximè Motui tribuenda sunt, varia illa repentina transmissiones, aut retentiones variarum secretionum & Excretionum, in eodem
B sape

sæpe subjecto obtingentium diversimodè, pro diverso tempore, vel aliis circumstantiis

ITa v. g. interdum contingit, ut aliquis mox à largiore potu, liquoris de cætero consueti, multum Urinæ colligat, alia proximâ vice nequaquam: ubi præcipuè illa *congestio* Urinæ tantò magis invalescere observatur, quo magis de ipsa *cogitat*, & veluti *metuit*, ipse potator. Quod quidem faciliè obtingit, si *Corticalis* portio renum relaxata, multum Sangvinis irrumperere sinat, ut itaque *secretio* urinæ pauco tempore copiosior inde succedat. Ita planè obvium est, & annotavit in seipso Willisius, quod personæ *perspirabili* corpore instructæ, & in copiosam transpirationem proclives, si *calido* Corpore de lecto surgant, & maximè *udo*, indeqve aliquandiu in liberiore aurâ sine vestibibus obambulent, Corpusqve levi *frigore* percellatur, mox aliam subordinatam evacuationem serosam, hujus retropulsæ loco experiantur, nempe *ex-*temporaneam *alvi* laxationem, ut ita genus, *Excretio*, & *specie* utique (licet non numero) *idem* Excrementum, suppleatur, & subordinetur. Maximè verò sensibiliter tale quid contingit in usu *adstringentium*, i. e. *Motum Tonicum* intensiorem provocantium, quorum proinde efficacia citò latissimè diffunditur, non quod ipsa *corporaliter* ad totidem partes penetrent, sed quod provocatus insigniter in *una* parte *Tonus*, per plurimas ita continuetur, in quo quidem genere ne scrupulosius aliquod exemplum afferam, illud sisto, quod sceminis *hemorrhagiâ narium* justo longiore correptis, satis præsentis auxilio frequentissime est, si nempe *inopinatò* *frigidâ* aqvâ conspergantur, unde *horror*, seu *contractio* *Tonica*, adeò *totum* Corpus pervadit, & vasorum *ambitus* comprimit, contentumqve Sangvinem reprimat, ut mox subsistat etiam *specialis* ille fluxus. Unde etiam juvat vel non juvat experimentum, prout *terrorem* inde, seu *horrorem*, concipiunt, vel non concipiunt. Ubi simul obiter noto, quod talia quasi *stuporem* horridum provocantia, (seu *rigidam* adstrictionem *Toni*) effectu suo maximè respondeant, prout pars Sangvine fluens, vel de *externi* Corporis Systemate, vel de *interni* communione, fuerit; Ita in

hamor-

hemorrhagia Narium talis extrinseca refrigeratio subinde conducit, quâ Contractio Tonica horrida, per habitum externum Corporis, concitatur: In hemorrhogiis verò interioribus, ut uteri, nihil prodest, sed tum demum voto respondet, si interiorum partium Systemati accommodetur, unde tunc temporis efficaciam quoque exserit, si Hepatis regioni lintheamina aquâ frigidâ imbuta imponentur, adeoque horridula illa contractio, in viscere aliâs calidior, primò proritetur (licet illa in ipso hoc viscere deinde non rarò ita invalescat, ut obstipatio perennis, œdemata, aut Hecticam maturè post sese trahat.)

THES. XI.

Tonicus Motus, Spasmodicus Motus, & Convulsivus Motus, differunt, ut genus & species; Tonicus, est s. n., universalior, & omnibus partibus solidis, præter solas cartilagineas & osseas, familiaris, lenis & successivus, indeque hætenus ne quidem observatus: Spasmus, est Motus Tonici repentina exacerbatio, contractoria, particularis, in musculosis, iisq; communius paucis simul, partibus, gradu insignis, repentinus, & facile perceptibilis: Convulsio, est Motus Tonici completi, nempe contractorii & relaxatorii, exacerbatio, in partibus porosis Sanguiferis seu musculosis. Et adeò tam Spasmus, quàm Convulsio, sunt p. n., Motus Tonici s. n. exacerbationes.

DE veritate, & necessitate sive usu, Motus Tonici, hætenus diximus; Spasmus vocabulum est, quod semper aliquid violenti Scriptoribus denotat, ut & Convulsio: placet itaque,

Toni vocabulo, ad *naturale*, debitum, robur partium, uti, *Spasmus* verò, pro p. n. *exacerbatione* ejusdem retinere: Interim ut in *verbis* facillimus esse laboro, ita circa *res*, adeò absurdus non sum, ut, quia primus explicare hoc negotium suscepi, aliquid inde laudis captem, unde lubentissimè accipio, quod ipsa *res* saltem, hic illic, mecum agnoscatur, si maximè displiceat, eandem appellationem usurpare, ne scilicet fortè, me monente hoc deprehensum esse appareat, sed dudum, & neglectim, perspectum, quod facillimè patiar mihi persuaderi.

THES. XII.

Hæc transpressio Sanguinis, per solidas, porosas, sive spongiosas partes, est potissima causa mechanica, quæ Sanguinis sufficiens fluxilitas & tenuitas conservatur: sine quâ ad grumescentiam, lentescentiam, gelascentiam, prolabitur.

Nimirum *spissus* humor est Sanguis, qui *frigore* gelascit, seu in *gelatinam* inspissatur; *Calore* majore obdurescit & densatur, vel farciminum, quos apexabones vocant, exemplo: *Lento* verò agitationis motu, in *mucidam* tenacitatem tendit. Si verò agitatur, *dirimitur*, & fluxilis evadit, unde vel œconomico-culinarum exemplar, concutiendi sanguinem Suillum, ne concreascit: Quod pariter succedit, si *spongiâ* agitetur Sanguis, unde floridissimus & tenuissimus manet. Idem itaqvè contingit etiam in Corpore, ubi Sanguis mediante *pulsu*, impellitur, in poros partium, & concurrente *tono* transpellitur, adeoque hoc ipso actu, *tenuis, fluxilisq;* redditur. Si hoc alicubi cesset, ut portio Sanguinis vel *intrâ poros* partium subsistat, vel planè in *cavitate* aliquâ insigni, aliquandiu *immota* jaceat, *crassescit* citissimè, & in corruptionem vergit, eamqvè actu subit, nisi vel *Salsedine* Seri quasi condiatur, vel reliqui Sanguinis *alluentis, & præterfluentis* impetu, illæ particule, quæ *putredinosam* corruptelam fubeunt, (*subtiles, acres, fluxiles, fiunt,*) abstergantur, & auferantur.

THES. XIII.

Hæc eadem transpressio, est causa mechanica Colatoria Secretionis, quâ tum utiles Humores, tum excrementitii, per proportionata Colatoria, perpetuò sequestrantur.

Lympha cum Sangvine dispensatur ad partes, ut nutrimentè penuarium, itaque intimè partes, quas nutrire debet, perreptare necesse habet; Sanguis eòdem penetrare debet, tam propter seipsum, ut tenuitas & fluxilitas ejus conservetur hoc transitu, quàm propter partium conservationem, à quibus hoc motu & transitu omnem corruptelam avertit & abstergit, mollesq; ipsas & agiles servat: Serum, ut Sanguis longo usu & motu extenuatus (& in partes sui constituentes, cum attenuatione, resolutus,) ob tenuitatem præcipuè, unà sese, ad intima infinuat partium penetralia. Dum hoc pariter ita fit in colatoriis, Secretoriis, & Excretoriis Organis, ut nempe Sanguis, cum Lymphâ & sero sibi intersusis, in porosas tales partes adigatur, ibitum ipse quidem Sanguis, ut compositum crassius non penetrat, nisi in laxiores horum organorum poros; Lympha, utpote longè tenuior & fluxilior Sangvine, in arctiores longè meatus imprimitur, adeoque à Sanguinis consortio semovetur: Serum tenue, salsum, acre, partim Lympham extendit & tantò fluidiorem reddit, atque in poros tenues invehit, partim ipsummet, per adhuc tenuiores, & ultimæ densitatis poros, relictâ post se Lymphâ, dilabitur. Unde manifestò oculis discernere licet gradum densitatis in diversis colatoriis; Ubi Sanguinea generatim, carnes, Splen, pulmones, sunt laxa & patule porositatis: Lymphatica, glandula, Hepar, notabiliter densioris structuræ: Serosa, Renes, cutis, cuticula, inter hæc omnia densissima. Adeò, ut si quis secretionis Lymphæ & feri simplissimum mechanismum, qui temporis maximè concursu absolvitur, percipiat, ille merito sollicitum illud figmentum hodiernum, de Specificâ figurâ pororum, pro specialibus humoribus transmittendis, pro superfluo negligat. De quo alibi.

THES. XIV.

*Transpressio hæc Sanguinis, quo violentiore pul-
su, & majore nisu tonico, seu tensivâ duritiæ
partium, peragitur, eò major oritur Sanguinis
incalescentia.*

CAutè loquor, ne in longam demonstrationem implicer,
quæ specialem tractationem requirit, vix tamen magnâ
brevitate uti potero, licet summa tantùm capita hujus
negotii attingam. Proposui antè hos *undecim* annos, Auditori-
bus tunc temporis meis Ienæ morantibus, magnum illud *Para-*
doxon, quod *Pulmones sint organum primarium conservandi caloris*
Sanguinis; Ita sanè non modò contrà *antiquitatem*, sed & contrà
omnem *recentiorem ætatem*, non potui non impingere: Nequè
defuerunt sanè (ut in alia mea) censuræ, sed defuerunt profectò
erudita. Ego his præcipuè argumentis confirmo. Quæcunque
Pars Corporis, per quam *ordinariè* Sanguinis *copiosus* transit, si
fortiter moveatur, modò *relaxativo*, modò *constrictivo* motu, (ut
ita Sanguis copiosè immissus, sub *relaxatione*, citò & vehementer
transprimatur, sub *contractione*) *incalescit* inde & pars & Sanguis.
Probationem vel pueri sciunt, qui à *motu* longiore, aut univer-
saliore, citò *incalescere* & sudare, sese, aliosque, vident. Jam si in
Corpore sit aliqua pars, *ampla* & *capacis* magnitudinis, per quam
maxima copia Sanguinis *perpetuò* transeat, quæ *fortiter* omninò,
& *perpetuò*, moveatur, remissivo & constrictivo alternante motu,
necessariò *perpetuò* in illâ Sanguis, & illa cum Sanguine, *incalescet*.
Sunt verò tales, *Pulmones*. Huorum (seu thoracis) motionis impe-
tum, ut vulgò non attendimus, ita illo tantùm exemplo adum-
brare soleo: Quod si alicui supino, *centenarius*, in medium pe-
toris imponatur,) in os sterni nimirum, non verò infra sternum,
in abdomen) ille inde non nisi valdè tolerabilem laborem sibi ad-
ditum putabit, adeò, ut & *respirationem ordinariam*, & præter ipsam
hoc pondus, sine summo labore, possit movere: Unde infero,
quod vis motoria *ordinaria*, sub respiratione, major sit, quàm
illa,

illa, quâ aliis membris Centenarius movetur, quia Centenarius illi oppositus, eam parum remoratur. Jam si quis Centenarium toties tolleret, quoties fit respiratio, ille mox ad *incalescentiam* insignem & Sudorem pertingeret: Sine dubio itaque hîc etiam, in *pulmonibus ita motis, incalescentia* similis ordinariè produceretur. Quemadmodum verò hæc sic satis evidentia sunt, ad demonstrandam velut *à priori*, thesios illius veritatem; Ita non in illis solis acquiesco, sed *à posteriori*, duo profero *Experimenta*: *Primò*, videmus à citiore *respiratione*, & fortiori illius propressione, quâ citò, aut rigidè, (aut utrumque) tenduntur pulmones, *incalescere* sanguinem universum, ut contingit *clamando, declamando*, diu & vehementer *tussendo*; exemplo sanè sunt declamatores & Oratores, qui hyemè, sub sermonibus clamosis, sudant in *Cathedris*, calent, rubent. *Secundò*, usus *respirationis* perpetuæ & ordinatæ, convertitur cum *calore Sanguinis*, ita, ut axioma sit: *Quacunque animalia perfectè respirant, ea habent Sanguinem Calidum*; &: *Quacunque Animalia habent Sanguinem Calidum, illa perfectè respirantia sunt*. Quod adeò verum est, ut etiam illa animalia, quæ frigus maximè tolerant, & tamen *calida* manent, majorem & frequentiore pulsum habeant, *felium, leporum, cuniculorum* &c. exemplo. Ex quibus omnibus, uti *thesin* nostram, pridem collegimus (nimirum: *Quod pulmones, non refrigerando, sed calefaciendo sanguini, primariò inserviant*;) Ita generale argumenti fundamentum, ab *Experientiâ* reliquarum partium Sanguifluarum accepimus, quâ nimirum sensibus cognoscitur, quod à talium partium motu, adeoque Sanguinis impetuosiore *transpressione*, *incalescentia* ipsius consequatur, idque adeò, ut etiam *nihil alterato pulsu*, particulariter, à solo partis motu, *incalescentia* hæc concitetur. QVOD, inquam hoc ita contingat, nostræ *Thesi* stabilizendæ, suffecerit, *Experientiâ* confirmasse: QVOMODO verò fiat, ut à majore partium *tensione* & *nisu*, adeoque Sanguinis fortiore *attritu*, calor oriatur, hætenus non æquè opus est, scrupulosius pensitare. Unum tantum addo exemplum, sic dicti Temperamenti *Cholerici*; habent illi, qui huic Temperamento accensentur, 1) *Carnes densiores, tensas, strictas* (unde *macriores* apparent) adeoque *arctioribus poris præditas*. 2) *Vasa conspi-*

cua, ampla, quia, cum sanguis in poris partium, extra vasa, multum spatii non nanciscatur, tantò copiosius in vasis stabulari, necesse habet: 3) floridum & benè mobilem Sangvinem: 4) Celeriore pulsum, qui nimirum veloci impetu pressionem suam perficiat: 5) Confectarium itaque est, quod majore calore conspiciui sint, adeò ut v. g. in lecto cubantibus, quicunque aliushabitus s. temperamenti, unà cubat, quasi igneum calorem & æstum à talibus emanare putet; Quod, ne in Temperamento melancholico (quod primas duas circumstantias, densitatis pororum, & plenitudinis vasorum, cum Cholericis communes habet) pariter, contingat, obstat contrarietas Tertiæ circumstantiæ, spissitudo nimirum, adeoque minor mobilitas, sanguinis, unde & 4) pulsus his est languidior & tardior, adeoque Confectarium caloris majoris, abest. Interim, pro futuro usu, Thesis hæc confirmata notanda fuerit, & sequentes quoque, quæ inde fluunt.

THES. XV.

Quandocunque itaq; Calor major in sanguine necessarius est, tunc pro hoc effectu, maxime secundum naturalibus mediis obtinendo, augetur vel pulsus, vel tonus, vel uterque: Quandocunque etiam major attenuatio sanguinis, aut citior secretio ex sanguine, necessaria est, tunc, itidem, s. n. pro hoc effectu, augetur motus pulsorius, aut tonicus, aut uterq; (per th. XII. & XIV.) Hoc ipso verò per accidens, necessitate tamen consequentia, unà intenditur tunc quoq; calor.

Exempla, secundum naturam, non ita copiosa suppetunt, præter illud, quod observatur sub tempore concoctionis & distributionis Ciborum; Ubi in Corporibus sanioribus percipitur, quod post pastum, non modò pulsus invalescat ad sensum, tam in vigore, quam velocitate: sed etiam calor & color intendatur,

tur, quod præcipuè *frigidior* tempore sentitur, ubi à pastu melius toleratur frigus, quam vacuo ventriculo: Imò in multis personis eousquè invalescit hæc *incalescentia*, ut ad *Sudorem*, omninò progrediatur. *Præter naturam* verò non pauca suppetunt, quæ tamen hoc loco, velut in præjudicium, jamjam producere, non necessarium est, sed suo loco testimonium dicent.

THESES. XVI.

Sanguis, Motu sui propulsatorio destitutus, in corruptionem ruit; Et alias partes in corruptionem unà ducit.

AB Experimentiâ hoc maximè patet, quæ tam *causalem à priori*, quàm *effectivam, à posteriori*, veritatis confirmationem exhibet. *A priori*, monstrat, quod Sanguis sit *compositum* è rebus admodum *infidè* cohærentibus, *aquâ, oleo, muco*; Ita ut *oleositas* quasi intrâ poros magmatis *mucosi* tantum irretiatur, & ita *aquæ* immergatur, non verò valdè *intimè* subacta sit: Unde, qualicunquè *intestino durabili* motu accedente, mox dirimuntur. *A posteriori*, notum est, quod Sangvinis moles, non modò ex omnibus partibus animalis, sed & ex omnibus *mixtis* sub sole, *promtissimè* corrumpatur, i. e. *fermentativâ dimotione* partium sui constituentium afficiatur. Ex utrisque his Experimentiis, notum est, *quantum & quare*, sanguis intrâ partes solidas subsistens, in *corruptionem* proclivior fiat, & ipsas illas partes citius, quàm quicunque alius humor, in consortium corruptionis colliquet.

THESES. XVII.

Corruptio hæc, est oppositum Vitæ.

ÆQuum hîc exopto, & præjudiciis vacuum, Lectoris animum, sed & ad *judicium* deinde, actis & probatis conforme, formandum, parem. Sanè apud plerosque (si non omnes) Autores, valdè obscure tractatum reperio: *Quid sit Vita*. In aliorum placitis, vel explicandis, vel notandis hærare, temporis & moris nostri non est, rem ipsam evolvemus. Diligen-
C ter

ter distinguunt antiquioris dogmatis Medici Physiologi, inter
Temperamentum Mixti & Vivi: Modum differendi, ipsi quidem,
non adeo exquisitè tradunt, cum nequè de *Principiis* Sangvinis
proximis satis certi essent, neque *fermentationis* negotium per-
spexissent: Interim reverà alium statum esse Corporis, & præci-
puè sangvinis, *seorsim*; nudè secundum suam mixtionem considera-
ti, & in actu *Vitalitatis* spectati, utique certum est. *Seorsim*, &
nudè secundum suam *Mixtionem*, examinatus Sanguis, est com-
positum fluidum, è rebus valdè infidè cohærentibus, (aqua, oleo,
muco,) valdè & diversimodè mobilibus, adeoque facilè è suâ
compositione dimobilibus, seu *putridè-fermentabilibus*. Ita non
modò *per se* in corruptionem suæ compositionis præceps existit,
sed & aliis Corporibus, *mixtione affini* constantibus, in consortium
corruptionis deducendis, aptissimus est. Contrà, in actu *Vita-*
litis constitutus Sanguis, ab omni corruptione *Fermentativo-pu-*
tredinosâ immunis, longissimo tempore durat, & ipse etiam, per-
petuo libero *transitu* per poros partium corruptibilium, easdem
ab omni corruptione pariter conservat. Hæc si quis inter se ex-
actè conferat, directè utique inde concludet: *Modus differendi in-*
ter Mixtum & vivum, est Corruptibilitatis Mixti (valdè corruptibilis)
diversitas; *per se* enim, huic liberè expositum est: *Vita* verò, ab
eadem præservatur. Et consequenter inferet: VITA ergo est
conservatio Mixtionis valdè corruptibilis. Et hoc generalissimè. Ul-
terius verò, si spectetur, quod Sanguis in statu *vivo*, planè nihil
in suâ *Mixtione* alteretur, quod (evidenter) ipsi nihil addatur, nihil
(à mixto ejus) detrahatur, adeoque planè nihil materiale (sensibi-
liter) hunc actum *conservatorium* præstet, i. e. quod nulla res, ma-
teriali suo influxu, congressu, concursu (sive *positivo*, intermiscen-
do, sive *privativo*, abscedendo) hoc efficiat: Sed *formali* tantum
concursu (nisi mavis, *efficiente*, aut *instrumentali*) extrinseco;
Tunc facilè stringetur *vite* descriptio, quod nempe dicenda sit:
Conservatio Mixtionis, valdè corruptibilis seu dissolubilis, sine ullo mate-
riali concursu, aut Mixtionis ullâ alteratione, in ordine ad potentiam
corruptionis, sed tantum ad actum. Porro, si attendatur, quod *Con-*
servatorius hic actus, non ab ullo Principio procedat, quod ex-
trà Corpus Animale subsistat; Imò quod potius omnia illa, in-
ter

ter quæ Corpus necessario versatur, aër, calor & frigus, Humor & siccitas, esculenta & potulenta, maximè ad corruptibilitatem alterent Sangvinem; Tunc adhuc specialius determinabitur definitio: Vita est Conservatio Mixtionis summè corruptibilis (inter media Corruptionis organa) sine ullo tamen materiali concursu, aut Mixtionis alteratione in potentiâ corruptionis, à Causâ seu principio, quod Corpori intrinsecum existit, proficiscens. Nunc demum ulterioris indaginis occurrit quæstio: An Conservatio illa fiat inorganicè, an verò organicè? Sive: An Principium illud intrinsecum, Conservationem hanc, Mixtionis valdè corruptibilis, inter ipsa media corruptionis Organa, præstet immediatè efficienter: an verò mediatè, per organum sive instrumentum aliquod.

Trifariam maximè scinduntur hîc opiniones. Antiqua, & plerorumque recentiorum tralatitia, est, Spiritus Vitales maximè esse illud, quod Sangvinis Mixtionem à Corruptione vindicet. Altera est quorundam Recentiorum, qui Balsamum aliquod vitale, seu specialem valdè tenuem, & omni putredini resistantem, materiam, in Sangvine contineri & obversari putant, quæ tamen, si curiosius inspicatur, cum Spiritibus vitalibus, apud aliquos dissertè, apud alios per justam consequentiam, coincidit. Sed cum, nolimus dubitativè, aut negativè, procedere, supersedemus difficultates demonstrationum urgere, neque quicquam monemus, præter illud unicum: Remanere utrinque dubium, QUOMODO vel Spiritus, vel Balsamus, conservationem hanc præstarent, quod tamen hîc est τὸ κενώμενον.

Tertia verò sententia statuit, Mechanicè fieri hanc Conservationem. Est verò iterum duplex: Altera generalissima, & (ut sunt hodiè, qui nihil nisi mechanicam in ore habent, mechanicæ Specialioris plerumque miserè rudes) confusissima, quæ modò in poris sangvinis, ætheri transmittendo exquisitissimè proportionatis, modo in hujus ætheris, rectilineo motu, modo ejusdem, nisu, modò innominabilibus quidem, sed tamen miris, mirum quantis, elasticitatibus, &c. Mechanismos suos omnes complectitur, iisque specialissima quævis Phænomena, felicissimè & dilucidissimè, explicat, & quicumquè adhuc specialia dubia circa modum fiendi observant, pro stupidis, & mechanicæ incapacibus tor-

ro supercilio despicit: *Altera* verò ex *specialioribus*, & inter se simplicissime coherentibus circumstantiis colligit; quod *Motus* ipse *Progressivus* seu *Circulatorius* Sangvinis, sit ille *Mechanicus* actus, quo *Corruptio Mixtionis* Sangvinis libera, fermentativo-putredinosa, prævertatur. Observat verò fieri hoc sequentibus concurrentibus actibus. I. *perpetuâ transpressione* per subtiles poros partium perpetuò attenuatur sangvis, ut in coagulum seu gelascentiam coire non possit; Deficiente hac transpressione *discussoria*, densatur promptissime. II. Transpressione eadem, *per Celatorias partes* separatur non modò omnis tenuior, & ad concitandam, *fermentationem putredinosam* apta materia, *aquoso-oleo-salina*, sed & omnis, in quamcunque corruptionem prolapsa, portio, à tenuioribus talibus, *acribus*, *pingvibus*, valdè *mobilibus*, seu fermentationem putredinosam diffundentibus, partibus, repurgatur. III. Quod ipsum tantò magis necessarium erat, quia ab ipsâ violentâ illâ transpressione, & calore inde, vel nascente, vel perennante, intimè seu intestinè quassatur sangvis, ut mixtio ipsius non modò sensim labefactetur, & successivè solvatur, sed & partes ipsam constituentes, successivè divulsæ, simul magis attenuentur, adeoque tum ipsæmet, in ulteriorem corruptionem proniores fiant, tum reliquum Sangvinem variis modis dissolvere, & ipsas partes solidas corrumpere, possent. Ne itaque sangvis mucescat, *mechanismus* transpressionis *discussoria* adhibetur; Ne gelatinascatur, calor, & quidem *mechanice*, attritu, inducitur: Dum sub his *Motibus*, mixtio ejus successivè solvitur, & major mobilitas, particulis ita divulsis additur, *mechanismus transcolationis*, & excretionis, adhibetur. Perficiuntur verò hæc omnia, MOTU, ad partes, & per partes, & partium congruâ structurâ, pro variis portionibus tenuioribus seorsim transmittendis, & ad excretionem colligendis.

Quemadmodum verò modò mentionem facio congruæ structuræ, ita constructionis & restorationis, verbo, formationis & Nutritionis, negotium, ab actu vitali nequaquam excludo, sed distinguo tantum solidarum & fluidarum partium, productionem, & conservationem; Tum etiam potiore illum vitalem actum, ipso jure censeo, qui parti maximè mortali, (corruptibili) contingit, & quidem omni tempore æqualiter, & incessabiliter dum Nutritionis

in

in solidum, seu *structura*, actus, apud adultos non admodum, amplius viget: *Mixtionis* verò *conservatio*, indispensabilis manet, præcipuè partium maximè corruptibilium, *Humorum*. Sed de hoc satis.

THES. XVIII.

Ad corruptiones, vel imminentes, vel incipientes, prævertendas & supprimendas, maximè consentaneum & adequatum est remedium, Motum Sanguinis, Secretorium, & Excretorium, proportionatè intendere.

M*echanismum* diximus esse, quo Sanguis à corruptione præservatur, & orientes in ipso corruptiones eliminantur; *Mechanismum* hunc consistere diximus. 1) in *Motu perpetuo* transpressorio, quo Sanguis fluidus, depurabilis, conservetur; 2) in depuratione ejusdem *transcolatoriâ*, dum sub hoc *Motu*, seu *transitu*, per *Organa colatoria*, tenuior, acrior, activior, fermentescens, portio, (vel illata in Sanguinem, vel in ipso nata) perpetuò sequestratur, & à reliquo utili, puro, proscribitur. Quotiescunquè itaqvè corruptela talis in Sanguine ingravescit, primum, proximum, & maximè proclive remedium utiqvè est, *Motum* illum proportionatè augere, ut *extraordinario* negotio par sit, & sufficiat.

THES. XIX.

Sanguis dissolvitur, & consumitur, secundum naturam.

A Deò infidæ cohæſionis est *Mixtio* Sanguinis, ut impossibile sit, quin sensim labefactetur & dissolvatur, quocunquè tandem artificio sustentetur. Ipso *Motu illo locali*, qui à *putredinosâ* corruptione Sanguinem præservat, labefactatur successivè *Mixtio* ejusdem, & divelluntur *partes* ipsum *constituentes*; Neqvè divelluntur tantum, sed *atteruntur* simul & attenuantur,

tur, ut longè mobiliiores, *acriores*, & penetrantiores evadant; Contingit verò hæc attenuatio præcipuè subtili *mucofitati*, & *pinguedini* Sangvinis, ut *mucilago* illa, sensim in *salinam* tenuitatem, *pingvedo* in *oleosam* agilitatem, redigantur: Ex horum ulteriore connubio, oritur *acrimonia*, *mixtionibus* periculosa, *fermentescens*, *solidis* verò partibus noxia, *rodens*, *irritans*, *vellicans*, *urens*.

Ne itaqvè noxiam hanc suam habitudinem, in detrimentum reliqui totius Corporis, exserere possit, institutum est summæ prudentiæ, ut maturè eliminetur, & summæ artis, quod talis adfit *Colatoriorum* Constructio, quæ *tenue* illud, *agile* & *activum*, per hanc ipsam suam tenuitatem, à reliquo segregare, & eliminare possint. Dum verò hoc ita, perpetuo successu, contingit, necessarium utiqvè est, consumi hæc ratione paulatim Sangvinem. Materia illa, quæ ex Sangvine ita *resoluto* nascitur, *Serum* dicitur; ab aliquibus addito epitheto, *excrementitium*, ut aliud nutritium quoqve vocare possint: Cum verò hoc *nutritium* cum *Lymphâ* Synonymum faciant, verborum compendium esse censemus, *Seri* vocem, effæto, emerito, dissoluto Sangvini, *excrementitio* liquori: *Lymphæ* verò nomen, suo quoque liquori, utili, (citrà inutilem, Synonymiam) tribuere: Interim nec illis, qui in verbis etiam luxuriare amant, legem præscribimus.

Cæterum ultimo loco in Thesi diximus, fieri dissolutionem hanc, adeoqve & consumptionem Sangvinis, ordinariè seu *secundum Naturam*. Quod ut in se manifestum est, ita notanda tantum adhuc semel est differentia illa, inter hanc *dissolutionem*, cum perpetuâ *transcolatione* (& maturâ ablatione) conjunctam, & *putredinosam fermentatoriam* dissolutionem, quâ portiones tenues *oleoso-Salinæ* semel formatæ, liberè in totâ massâ vagantes, illas quæ ipsis *congeneres* sunt, magis magisque concitant, *liberant*, impellunt, ut adeò corruptiva fermentatio per totum latifundium liquoris invalescat.

THES. XX.

Quò plus humiditatis serosæ per transpirationem dispellitur, eò spissior est Urina.

Sanguis è tribus materiis ad sensum compositus est, *muciditate pinguedine, aquositate*; In has dissolutus iterum facessit, nequaquam tamen sine alteratione: Pars enim *mucilaginis* tenuior, extenuatur in actuale *Salsedinem*, *Pingvis* portio, subtiliatur in maiorem puritatem, adeoque penetrantiam *oleosam*, *Aquea* verò, ab horum, præcipuè *mucoris*, nexu, liberior, non modò altius penetrat per *subtiles* poros; *colatoriorum* tenuissimorum, sed adeò etiam ad excretionem promptè prolabitur, quod non æquè contingebat, quandiu *mucilagini* immersa hærebat. Hæ substantiæ imposterum partim *inutiles* Corpori futuræ essent, partim, successu temporis, *noxie*; *Salsedo* namquè *sensibiliter* afficere partes *solidas* posset, *turbare & liquare* partes *spissiusculas fluidas*, *Oleositas* verò, *fluidis* præcipuè *fermentativam* perturbationem intenteret, *Aquositas* emolliret *solidas flexiles* partes, earumquè adeò *Tonum* subverteret: Quorum ne quid undique contingat, pro excrementiis secernentur, & ejiciuntur. *Salsedo* itaqvè abit potissimum per *Urinam*, *Oleositas* maximè per *Bilem*, *Aquositas* verò partim cum *Salsedine* per *Urinam*, sed copiosius, per *transpirationem & expirationem*. Interim permiscuntur invicem, aliquid *pinguedinis* etiam *Salsugini Urinosa*, & modicum *Salsedinis*, *Oleositati Biliose*, quinimò cum ipsâ *aquositate*, divaporat nonnihil tenuissimæ *Oleositatis*, (unde odor ille specialis, canibus præcipuè ad dignoscendos heros suos inserviens) & cum eadem largius & confertim effluente, emanat nonnihil *Salsedinis* quoque dilutioris. Quandocunque itaqvè contingit, ut aliqua harum *evacuationum*, vel *imminuatur*, vel *augeatur*, tunc redundat illud *excrementum*, *proportionatè*, ad reliquas excretiones, ut vel ad illas unâ tendat, quod alibi pertransire & excerni nequit, aut si aliqua ipsarum copiosius & liberius effundatur, perit ejus *commeatus socius* cum reliquis. Manifesta exempla, occurrunt in Statu p. n. Ubi v. g. obstructo meatu *bilis*, redundat hæc ad reliqua colatoria, ut non modò universus *habitus* Corporis (ad quem aliàs tantum tenuior *aquositas* procedit) inde inficiatur, sed imbuitur eadem etiam *Urina*, ut planè spissa, obscura, atrorubicunda, & *roceo* colore *linea* tingens, profluat: Ita in successivè cohibitâ liberâ *transpiratione*, (naturis cæterum vegetis) v. g. à diuturnâ morâ in frigore,

ma-

maximè solenne est, ut multum *Urina*, & quidem *tenuis*, reddant: In criseos quoque solennioris per *Sudorem*, molimine, præcedit *Urina* imminutio: In *Cholerico-Dysentericis* profluviiis, imminuitur eousque *Urina*, ut subinde ad plures dies penitus supprimatur: Contrà, in iis morbis, ubi non modò alvus (quasi *consultò*, sanè *utiliter*) cohibetur, sed & parum vel nihil cibi assumitur, (adeoque *folliculus felle* à stomacho parum comprimitur,) prodit ordinariè *Urina tinctior*, adeoque evacuatur portio major *bilis* per hanc *extraordinariam* viam. Ex his omnibus patet tantò promptiùs, cum *Urinariæ* *falsuginis vehiculum*, & dilutorium, sit *aquasitas serosa*, quod, ubi hæc alibi dissipatur, tantò minùs diluta, adeoque *saturius* falsa, & spissiuscula, inde reddatur *Urina*. Est hoc manifestum etiam in personis robustè sanis, laboriosis, qui propter auctam transpirationem, imò frequentes *sudores*, ordinariè *falsiorem* *Urinam* reddunt.

THES. XXI.

Ad promovendam Coctionem primam, tum etiam ad promovendas Emollitiones, Abstersiones, & Ablationes, rerum superfluarum, aut noxiarum, intus, imò hinc inde, in Corpore, opus est affusione sufficientes Humiditatis.

UT hodiè nemo dubitat, quod *prima Coctio* maximè absolvatur per *fermentationem*, fermentum verò potissimum sit *Salivalis* liquor (ex *oris*, *Pancreatis*, *intestinalibusq;*, glandulis,) Ita ad hujus *fermentalis* menstrui sufficientem affusionem, opus est aliquâ velut *directione* copiosiore ad interiora. Tantò magis verò, si materia aliqua *difficilioris* coctionis, in primis viis hæret, maximè *naturalis* est methodus, copiosiore talem *fermentalem* Humorem eidem affundere, ut legitima illius *concoctio* obtineatur. Quando autem penitus aliquid p. n., excrementitium, *noxium*, circa *vitales* partes versatur, tunc unica NATURALIS via & methodus illud averruncandi, est, ut multum

Sanguinis eò affundatur, & copiosius fortiusque transpellatur, ut ita *noxia* illa materia, hoc alluvio abstergatur, & à parte affecta abstrahatur, sensimque, per congrua *Emunctoria*, è Corpore ejiciatur. Hæc, inquam, est illa unica via, quâ *naturaliore* modo, aliena & noxia è Corpore proscribi possunt. Quemadmodum verò pro quorumcunque *Humorum*, ad partem aliquam certam appulsione, primum vehiculum est ipse *Sanguis*, dum videlicet non nisi per *pulsum*, cum *Sanguine*, *Lympha* (ut *Saliva* materia) & *Serum*, ad omnes partes (*colatorias* quoque *speciales*,) dispensatur; Ita, *generaliter* quidem, *directione* aliquâ opus est *Sanguinis* ad illas partes, ut cum *Sanguine*, *Lympha*, (*Salivale*) & *serum*, copiosius eò feratur; *Specialiter* verò etiam ipsius partis, in quâ fieri debet, *separatio*, *relaxatoria* remissio, ad copiosiores *irruptionem* & *transitum Sanguinis* (& *conjunctorum Humorum*,) proximè accommodata est.

THE S. XXII.

Res præter naturam in Corpus ingesta, aut in Corpore nata, quò magis adhuc ad alimentorum, & Excrementorum, naturalium, Conditionem, & Crasin accedunt, eò facilius, eadem methodo & iisdem viis, quibus illa, secernuntur, & excernuntur: Quò magis verò abluunt, eò difficilius.

Triplicis generis diximus esse Excrementi *serosi*, id est, *Sanguinis effæti*, substantiam, *aquosam*, *oleosam*, & *Salinam*: Accuratè tamen loquendo, accedit *quarta* etiam consistentiæ portio, *mucor* nimirum *lentus*, *tenax*, aut ad minimum plus minus *spissus*. *Alimentorum* quoque *recrementa* sunt congeneris consistentiæ, nimirum vel *mucaginosa*, vel *salsa*, vel *aquosa* (ex *potulentis*) vel *oleosa* *acria* (præcipuè à familiari abusu *condimentorum*, *aromaticorum*, & *potuum vinoso-Spirituosorum*.) Ubi quidem maximè de illis *recrementis* alimentarium loquor, quæ *Sanguinis* massæ sese insinuare solent, adeoque inde secerni, &

per emunctoria excerni debent. His horum generum rejecta-
mentis segregandis, fabrefacta sunt *Colatoria*, quæ supra recen-
suimus. Nequè verò sufficit *præsentia* horum colatoriorum; ne-
què ipsa iusta & debita ipsorum *structura* totam rem absolvit: Sed
opus maximè est, ut rectè pervia & *permeabilia*, iusto & *propor-*
tionato tono, ferventur, & *motus* Sangvinis proportionatè ad illa
dirigatur, prout excrementorum illorum (præcipuè ex assumptis)
plus aut minùs præstò est. Prouti verò hæc secretiones, de ordi-
nariâ & consuetâ oeconomîâ animali sunt, ita si aliqua etiam præ-
ter-naturalia invalescant, quæ *generaliter* his classibus accenseri
possunt, tunc *mechanica* sanè ratio svadet, ut pervias quoquè
proportionatas jamjam *usuales*, unâ eliminentur.

Sunt verò talium generum, vel ea, quæ ex ipsis *serosis* recre-
mentis *degenerant*, vel ex *assumptis* incongruis colliguntur, vel de-
nique undecunque in Corpus sese insinuant. Quemadmodum
enim *seri* portiones, nimiam suam *tenuitatem*, (quâ successivè
nocere possent) ab *attenuatoriâ* agitatione, sub motu Sangvinis
transpressorio & calorifico, *progressivo* & *intestinali*, acceperunt; Ita
si *tenues* hæc portiones non maturè eliminentur, sed diu adhuc
cum Sangvine per porosas partes rapiantur, fit *tenuitas* ipsarum,
adhuc *major*, ut magis magisque ad præsentiores noxas habi-
litentur. Tanto magis valet hoc de illis recrementis, quæ ab *as-*
sumptis intra Corpus restitant; Sunt enim hæc communiter adhuc
valdè cruda & *fermentativa*, ut *Corruptorios intestinos* Motus, in
Sangvine, moliri valeant: quò diutius itaque retinentur, tantò
magis deducitur in actum hæc ipsorumabilitas. Omnes itaque
Corruptela seu *noxæ*, quæ à talibus ingruunt, accuratè perpenden-
do, nihil aliud sunt, nisi *nativæ* illorum *dyscrasie* major *exaltatio*,
aut copiosior *diffusio* & quasi *multiplicatio*, ut adeò *naturales* etiam
Secretiones & *Excretiones*, illis exterminandis adhiberi valeant,
dummodò *proportionatè* applicentur, id est, satis *tempestivè*, &
sufficienti quantitate, adhibeantur. Si verò materia illa *noxia*, vel
ipsa *noxæ* jam inducta, multum recedat à consuetorum horum
recrementorum genere, tunc tantò laboriosior & insolentior est
secretio & *expulsio* ipsorum. Ita animadvertere hoc licet in morbis
contagiosis, (quorum materia valdè *subtilis* & *pauca*, interim sum-
mè

mè *activa* seu *fermentativa* est,) quod hujus materiæ eliminationi, viæ & methodi *solitæ* minimè sufficiant, adeoque laboriosa, & *inconsueta*, operosa molimina, ipsi invenienda & accommodanda, sint, in quorum tam *inventione*, multa *anxietas*, *sollicitudo*, & *trepidatio*, quàm in *prosecutione*, multum *tergiversationis*, *erroris*, & *inconstantia*, observatur. *Mechanica* interim harum rerum causa est, quod ea, quæ *Colatoriorum ordinariæ* structuræ & *Motui* quadrant, facilè per ipsa secernantur, & contra, quod nempe est in ipsâ *Thesi*.

THES. XXIII.

*Nimia quantitas Sanguinis, impedit liberum
& expeditum ipsius progressum.*

Sanguinem abundare non posse, existimant aliqui, maximè ob duas rationes 1) quia fit *Thesaurus vitæ*, 2) quia *Natura* nihil faciat frustra. Sed missis *Rhetoricationibus*, probant contrarium sequentia: *Primò*, in ætate *juniore*, ubi *augmentatio* Corporis requiritur, consentaneum est, plus Sanguinis generari debere, quàm ad *presentem* tantum extensionem seu molem Corporis, exactè necessarium sit, sed *proportionem* quoque habeat, ad *futuram*: Tantò magis, cum concipi verisimillimè possit, quod ab ipso Sanguinis copiosioris impulsu, *distensio* partium ad majus *incrementum* commodè adjuvetur. Deinde idem facile concipi potest, de habitu Corporis *laxiore*, *molliore*, *spongioso*, *teneriore*; Dum enim fibræ hujus faciliùs impetui Sanguinis cedunt, & ita majores poros præbent, ad explendos hosce, plus plusque Sanguinis locum invenit, adeoque plus quàm stricta necessitas exigit, ejusdem probabiliter generatur: Neque verò dici potest, quod merè *inutiliter*, adeoque *stricto sensu frustra*, Sanguinem illum superfluum *Natura* generet, cum rectè perpendendo, homo ad *laborem* factus sit, cujus operâ, quicquid est nimium *inpresens*, facilè rursus consumere possit: Interim verò, *tertiò*, quod utique *natura* aliquid *superfluum* in Corpore generet seu congerat, adeoque (illo sensu, qui de Sanguine etiam dici valeat,) fru-

frustrà illud agat, manifestum utique fit ex *Pinguedinis* abundantis generatione, quam quidem vix conijcere possumus cui usui, nedum necessitati, ita coacervet. Tantò magis verò manifesta est illa redundantia, seu superflui generatio, in *sexu* fœminino, ætate *pubere*, extrà statum actualis *fœcunditatis*, seu *pregnationis*, ubi tantum nutrimenti, quantum ad fœtum alendum sufficeret, ex abundanti retineri, & in Sangvinem successivè converti (qui ordinariè *mensibus* deinde rejicitur,) vix quisquam docilis dubitaverit. Elucescit etiam occasio talis abundantia Sangvinis, in *errore appetitûs*, ubi, sensuum fallaciâ, sanè plus cum appetitu ingeritur, quàm *necessarium*, aut *utile* erat; quod in dapibus gratioribus, & benè nutrientibus, quotidianum est, simulque rationi congruum, quod, cum in *appetitu* agere Natura possit, quod superfluum sit, in *nutricatu* quoque, seu retentione superflua illius quantitatis alimentorum, idem præstare valeat.

Quando verò *nimia* Sangvinis *Quantitas* in Corpore præsto est, tunc ex plenitudine utique impeditiorem progressum & distributionem cooriri, manifestæ consequentiæ est. Occurrendum huic negotio duplici viâ. Vel enim *distributorius Motus* intendendus est, vel *redundans* quantitas, idoneâ consumptione, *imminuenda*. Prius perficitur maximè *Motu voluntario*, seu animali, eoque *proportionato*; Tali videlicet, seu *tanto*, qui quidem ad *placidam* promotionem *Circuitus* Sangvinis sufficiat, non verò nimio *impulsu*, *Calorem* plus justò augeat, adeoque *spumidam* Sangvinis *turgescentiam* causetur, quæ *mensuram* ipsius adhuc magis extendat, adeoque *proximos* quidem *poros* partium, (in quos ex arteriis irrumpit) *distendat*, horum verò *appressione* comprimat *remotiores*, & ita partes *oppleat*, *transitum* præpediat, & in *stases* irretiatur.

Posterius, seu *consumptio* Sangvinis, ordinariè, & naturali *mechanismo*, unice fit *Motu* ipsius *progressivo*, & hunc præcipuè deinde consequente, *Motu intestino*, *fluiditatis* & *caloris*, quibus videlicet *Mixtio* Sangvinis sensim resolvitur in *serosam* vappam, quæ *tenuior*, per varia *colatoria*, è Sangvine segregatur, & per

con-

conjuncta *Emunctoria*, deinceps è toto Corpore exterminatur, ut
suprà dictum.

THES. XXIV.

Itaq; 1) pro Sanguinis Quantitate moderandâ, 2) pro ejusdem Qualitate ab omnibus Corruptionibus præservandâ, 3) pro omnium recrementorum ex eodem segregatione præstandâ, 4) pro corruptelarum coartarum secretione & excretionem, commodissimus, & sub ipsâ simplicitate, maximè artificiosus, mechanismus, est Motus Sanguinis Circulatorius, seu transpressorius, & Colatorius, ejusq; utriusq; proportionata intensio, pro quantitate & qualitate objectorum horum quatuor variata.

Quantitati Sanguinis imminuendæ inservit, auctior Circulatio Sanguinis, mediante quâ, breviori tempore, major ipsius copia dissolvitur, & ad excretionem disponitur, per Thesin præcedentem: Qualitati seu Mixtioni Sanguinis conservandæ, & à liberâ putredinosâ Corruptione præservandæ, succurrit ordinaria Circulatio, dum eundem perpetuò ad varia colatoria appellit, ubi omnes fermentativæ tenues, mobiles, partes, à reliquâ consistentiore massâ maturè abducuntur, & ipsa placida, fermentativa (intestina, per minima,) agitatio, fluctuatorio & pressorio motu turbatur. Eâdem ratione, appulsu nimirum & transpulso, per varia colatoria, fit recrementorum magis ordinariorum, tempestitiva sequestratio, æqvè ac aliarum paulò activiorum, recrementis tamen istis congenerum corruptelarum.

THES. XXV.

Juvat verò & promovet universum hoc ne-

gotium, maximè Motus Tonicus, præcipuè in Secretionum mechanismo augendo, aut cohibendo.

R Ecce statuunt Recentiores, quod per *pulsus* non possit plus Sangvinis *ad* unam partem Corporis propelli, quam *ad* alteram, nisi quatenus una pars majores, aut copiosiores, *arteriarum* ramos habeat; Rectè porro, quod *ad* talem partem, quæ copiosiores aut majores arterias habet, *ad* minimum non possit *uno tempore* præ altero, plus Sangvinis *pulsu* propelli, quàm ordinaria capacitas illarum arteriarum comprehendat: ut adeo, *mediante pulsu*, *ad* omnes partes, perpetuò *proportionatâ*, & *constanti equalitate*, Sanguis distribuatur. Licet verò maximè hoc ita fiat, potest nihilominus *Tono* ipsarum partium *figillatim*, *IN* unam partem *præ* alterâ plus *intromitti* seu recipi, aut plus ab illâ *præcludi*, distineri, aut actu *exprimi*. si nempe pars porosa vel *relaxetur*, in suo *Tono*, vel in eodem *intendatur*, & magis *constringatur*. Adeoque hujus maximè *TONICI Motus*, considerationem Lectori commendo, & quidem æquissimis conditionibus, ut videlicet tantisper saltem pensitet, QVOD utique tali viâ & methodo, *particulares* tales motus humorum, *IN* & *PER* certas partes, *admitti* aut *adverti*, possent, licet maximè *AD* illas partes, quasi *indifferenti* distributione, *pulsorio* tamen *nisu*, adingantur. *AN* verò actu tale quid fiat, & in quibus, & quotuplicibus, maximè *Februm*, circumstantiis, suo loco demonstrativè evolvere, nostrum erit officium.

THES. XXVI.

Pensitatis benè omnibus hætenus designatis circumstantiis, dilucescit, quod pleraquæ commenta, ad implicitum negotium VITALIS conservationis, adumbrandum, excogitata, in mechanismo Motus Sanguinis, attenuatorii, propul-

pulsorii, & depuratorii, planè *supervacua* sint,
& spontè concidant.

Duo nimirum circà *Sangvinem* & *Humores* ipsi remixtos con-
sideranda sunt, 1) *Quantitas* eorundem debita, 2) *Qualitas*
seu *Mixtio* ipsorum conveniens. Ad *qualitatem* spectat,
fluiditas proportionata, & perpetua *conservatio*, ab omni corru-
ptione *Fermentativa*. *Quantitatem* moderatur *debitus Motus*,
quatenùs successivè *resolvit* & *consumit* *Sangvinem*: *Fluiditatem*,
conservat, ipsâ *transpressione* per *tenues poros*: *Præservationem* verò
ab omni corruptelâ, & omnis *fermentativa* corruptionis præoccu-
pationem, præstat *transcolatoria* secessio, sub ipso hoc motu hinc
inde contingens. Perficitur verò hic *Motus*, 1) *intrinsecè*, impul-
su *Pulsûs*; 2) *extrinsecè*, *transpulsu* seu *transpressione*, *Tonico Mo-*
tu partium, *porosarum*, & quidem *ingenere*, omnium quasi *æqua-*
li, in *specie* verò, *Colatoriarum*, *inequali*, & *pro re natâ* accommo-
dato atqve *proportionato*. Ita ab *intrâ* quidem *pulsu*, ad omnes
partes *solidas porosas*, propellitur *Sanguis* *indifferenti* prorsus
æquitate, ut ad nullam partem *plus*, quàm *arteria* ejus capiunt,
dirigi seu *destinari* valeat: *Extûs* verò, in partibus ipsis, sita est
illa *mobilitas*, ut partes *Tonicè* moveri possint, i. e. ita *tendi*, ut vel
pori ipsarum *arctentur*, auctâ *tensione* fibrarum, vel iidem *pori*
relaxentur, *remissâ* *tensione* fibrarum, vel in *mediâ* *proportionatâ*
& *æquali* *tensione* teneantur, ad *mediocrem* transitum. *Pororum*,
verò tales *receptivitates*, subsequitur utiqve vel *Sanguinis* copio-
sior *ingressus*, vel contrâ, appellentis *minor* receptio, vel denique
mediocris *admissio* & *transmissio*. Cum enim *Sanguinis* *expulsio*
per *pulsu*, utiqve satis valida sit, & *vasa arteriosa*, singulis pulsi-
bus *levem distensionem* patiantur, (quæ est ille *pulsus*, quem vide-
mus & palpamus,) *nisi* inde perpetuus in *Sanguine* ita continua-
tur, ut ab uno *pulsu* ad alterum, restringatur *capacitas* arteria-
rum, adeoque *Sanguis* etiam illo momento, quo *Diastole* *Cordis*
fit, adhuc (licet *levius*) *prematur*; Unde tantò magis *irrupit*, si
inter partes *æquali* *mediocritate* pervias, una aliqua magis *pan-*
datur; Aut contrâ, tantò fortius *redundat* ad reliquas, (maximè
vici-

vicinas aut oppositas) si aliquæ solito magis arctentur, & equalitatem receptionis mutent: quæ omnia quidem cuivis *mechanicæ hydraulicæ* leviter gnaro, notissima sunt.

Sub his circumstantiis, non dispicio, quid vel *Spiritus Vitales*, vel *Balsama vitalia*, vel *Entia Astralia*, & similia portenta, sibi vindicare possint. Cum enim, dato, per DEI gratiam, *mechanismo* tam artificiosè coagmentato, nihil aliud necessarium sit, nisi solus *Motus*, ejusque *proportionata* ordinatio, secundum *tempus*, *gradum*, *durationem*, & interdum *consuetudinem*, quis illis rebus vel locus sit, vel usus, non capio. Si verò *Spiritus Motum* præstare, & ita *Mechanismum* dirigere debeant, *notitiâ* instructi esse deberent, horum negotiorum, secundum circumstantias *imateriales*, *gradum proportionatum*, *tempus*, *constantiam* in agendo, *durationem* agendi, *selectum* justî organi, &c. Sin autem placeat, *Spiritibus* illis hæc ita tribuere, ut quidem *scita* agant, sed non *scitè*, ut *secundum intellectum*, sed non *ex intellectu*, agant, mihi quidem perinde fuerit, cum res ista meam, *Medicam*, intentionem non tângat aut turbet, interim quod *cum intellectu* talia *intelligenti* persvaderi possint, valdè dubito & hîc quoque reminiscor illius Comici:

Næ faciunt homines intelligendo, ut nihil intelligant.

